

- 35 E'r gistuant uns méron then mánagfaltan uuéuon,
 bálo ther uns klíbit ioh léidor nu ni líbit!
 Thia frúma er uns intfúarta, uuánt er nan bírúarta;
 deta unsih úruuise fon themo páradyse,
 Fon scínenderu uúnni: uuáz er leunes uúnni!
- 40 tho irfírta uns mér ouh thaz guát, thaz er lóugnen gistúat,
 Thaz ér gigiang in bága thera gótes fraga
 ioh fon imo iz uuanta, thaz uuif iz anazálta.
 Ob ér sih thoh biknát, iáhi sos er dátí,
 zaltiz állaz ufan síh: ni uuúrtiz alles so égislih;
- 45 Iz irgiangi thánne zi béziremo thinge,
 got ginádoti sin: léidor, thaz ni scólta sin!
 Vuant er es thó ni uuard biknát, nu ist es béziro rat:
 tho santa drúhtin sinan sún fon hímilriche hérasun.
 E'r io mán ni gisáh thera mínna gimáh,
- 50 thero uuérko er uns irbót, tho uns uas háрто so not.
 Then gáb er ana uuanka bi únsih muadun scálka,
 thaz sin líaba houbit bi unsih mánohoubit;
 Thoh A'dam ouh bi nóti zi thiú éinen missidáti,
 thaz sulih úrlosi fora góte unsih firuúasi.
- 55 Nu birun uuir gihúrgte zi gotes thíonoste,
 uuir uuifun uuaz ther scádo uuas, thaz uuir got mínnon thes
 thiú báz;
- Ioh bírumes mit rédinu in zufualteru fréuuidu:
 nu uuir thaz uuizi miden ioh hímilriches bliden.

21. XIV. Iesus fatigatus ex itinere.

- Sid tho thésen thingon fuar Krist zj then hémingon,
 in selbaz géuui sinaz; thio buah nénnent uns tház.
 Thera férti er uuard irmúait, so ofto fárantemo duit;
 ni lazent thie árabeit es fríst themo uuárlicho mán ist.
- 5 Fúar er thuruh Samárium, zj éinera búrg er thar tho quam,
 in themo ágileize zi éinemo gisáze.
 Tho gisaz er múader, so uuir gizáltun hiar nu ér,
 bi einemo brúnne, thaz uuir ouh púzzi nennen.
- 10 Ther euangélio thar quit, theiz móhti uuesan séxta zit:
 theist dages héizesta ioh árabeito méista.
 Thie iángoron iro zílotun, in kóufe in múas tho hóletun,
 tház sie thes giflizzin, mit selben Kríste inbizzin. —
 Unz drúhtin thar saz éino, so quam ein uuif thara thó,
 tház si thes gizíloti, thes uuázares gihóloti.
- 15 'Uuif', quad er innan thés, 'gib mir thes drínkannes;
 uuírd mir zi gifúare, thaz ih mih nu gikúale'.
 'Vuo mág thaz, quad si, 'uuérdan (thu bist iúdiisger mán,
 inti ih bin théses thietes), thaz thú mir so gíbietes?'
 Thaz óffonot Iohannes thár, bi hiu si só quad in uuár,
 bi uuíu si thaz so zélita, thaz drínkan so frságeta:
- 20 Uuánta thio zua líuti ni eigun múas gimúati
 uuérgin zi iro mázze in éinemo fázze.